

四庫全書

集部

欽定四庫全書

集部

祠部集卷三十三

五

詳校官庶吉士<sub>臣</sub>朱理

檢討<sub>臣</sub>何思鈞覆勘

總校官編修<sub>臣</sub>朱鈐

校對官編修<sub>臣</sub>高棫生

謄錄監生<sub>臣</sub>朱一鳴

欽定四庫全書

祠部集卷三十三

宋 強至 撰

雜著

壽聖節人使三幅書

右番大使

誕聖膺期方祝岡陵之壽協隣遣使通觀原隰之華選

冒冬嚴益番時社

右番副使

流虹紀節會聖歷之開祥乘驛相儀亞使旌而修慶載  
惟妙履茂擁龐休

右番大使

祥繞電樞紀書王之首月命度星傳赴誕聖之先期載  
惟跋履之勤益介綏將之祉

右番副使

國壽開先紀千齡之震夙使才登貳動六轡之輝華順  
履隆寒亶膺多福

又

左番大使

比者電樞紀瑞行臨節之良星傳增華來奉慶儀之  
好仰惟妙履參萃繁禔

左番副使

比者國壽有開鄰懽胥講適屈流虹之節通勤飛驛之  
行順履冬嚴載蕃時祉

右番大使

此者華渚發祥紀聖期之震夙寶鄰講好飭使傳以馳  
驅遐冒隆寒倍綏吉履

右番副使

此者誕聖膺期睦鄰講好參使輶而戾止奉信節以勤  
斯征轡甫休粹襟滋壘

同天節國信三幅書

左番大使

虹渚發祥臨聖期之載誕星輶講好飭使傳以遐驅適

冒時暘愈完氣宇

左番副使

繞樞紀瑞符聖誕之初辰將幣相儀奉協鄰之雅好適  
臨近服滋屯粹襟

右番大使

千秋紀節適符祝嘏之期四牡戒行爰奉張旌之聘載  
惟菲薄諒協釐祥

右番副使

乘離首月出震初辰肅將信幣之來參示使軺之寵載  
勤長道聿集繁禧

與賀同天節人使三幅書

左番大使

里社發祥舉罄岡陵之祝軺車將命邁勤原隰之行適  
冒時暘諒安福履

左番副使

國壽有開符聖期之載夙隣懽胥講持使節以偕來將



事云初綏祺無爽

右番大使

火行在候符誕聖之初辰星傳戒行奉睦隣之重好征  
驂甫舍泰字惟寧

右番副使

流虹紀節會聖厯之開祥乘驛戒行亞使疆而相禮適  
臨近服滋鬯粹襟

代邵興中賀正旦人使三幅書

皇太后大使

某啓伏以歲時云始肆儀會於三朝原隰其華通懽思  
於二國載馳嚴馭甫戾近圻屬寒籥之貫辰諒粹襟之  
迪吉

皇太后副使

玉琯肇和方慶歲功之起寶隣修睦乃勤使驛之來多  
歷郵程此臨幾次神明所相福祚其蕃

皇帝大使

軒旋斗位會王歲之開端修講隣懽寵使華而將命冒  
風霜之餘凜驅駢傳以少休增固生經茂迎時福

皇帝副使

五始通臨百嘉滋鬯爰講邦家之好以均天下之休禮  
意交伸使才登選征駢遐御良多跋履之勞褰服甫臨  
益介綏將之祉

排食

遐冒霜稜肅馳星傳已次神畿之近竊循主道之常敢

羞庖餐以勞車從不腆之禮有慙在顏

攀違

奉幣成儀啓塗復命顧官居之有守躬祖席以無階少  
駐行暉悃塵禮具

代留守侍中契丹賀正旦人使三幅書

左番大使

玉琯肇和謹王春之此始寶隣修睦嚴使節之斯來星  
傳載驅天祺參嚮

左番副使

歲歷更端春祺備舍協隣講好交修禮意之勤將幣相儀登貳使華之選沍寒云冒福祚其蕃

右番大使

比者邦家相慶甫王歲之闐端原隰其華繁使才而相命載歷關河之邈豈無車馬之勤審次近圻亶膺多福

右番副使

天地發春邦家均慶榮命使擅之出肅將信幣之來矧

寒齋之貫辰諒粹襟之迪吉

代王尚書契丹賀正旦人使三幅書

左番大使

蒼震發春行講三朝之會皇華將命來通二國之歡甫  
舍征驂益依泰宇

左番副使

適新正歲開天地之大生登貳使才奉邦家之相慶適  
臨寒齋茲也粹襟

右番大使

王春謹始仰新璿運之觀使節講和增固寶鄰之好隆  
寒云冒純福其蕃

右番副使

華歲闔端具慶儀而有舊寶隣修睦遙使節以斯來六  
轡載馳百祥備舍

代滕元發北使三幅書

皇太后大使

某啓伏以吹律宣和方謹歲時之始協隣講好思同天地之休爰寵使華交伸禮意載厯闕河之邈竊惟車騎之勞順氣自持與時迪吉

皇太后副使

歲厯更端春祺備舍惟使車之修睦於鄰國以交懽星傳載驅適持於信節霜稜尚厲益固於粹襟

皇帝大使

蒼震發春行講三朝之會皇華將命來通二國之懽冒



霜序以勒斯聽車音之戾止仰惟妙履參萃繁禧

皇帝副使

王春謹始適新璿運之觀使驛講和益固寶隣之契適  
增華於原隰行稱慶於軒墀霜氣餘嚴天和參嚮

代馮內翰北朝賀登寶位人使三幅書

皇太后大使

炎運紹休肇御天飛之極皇華奉慶適度星駕之行甫  
次近畿亶膺多福

皇太后副使

伏審遠持信節恭致慶函驅星傳以少勤冒火旻之餘  
熾燕興遂適福祚其蕃

皇帝大使

嗣聖膺圖中天即昨邦家相慶增修鄰好之深原隰其  
華遠耀使才之美甫臻宸服茲邇粹襟

皇帝副使

聖統纘寧使旌修慶載歷闕河之邈深惟車馬之勞兼

冒秋炎諒雖時社

者詳知開封府縣度支郎中王克臣所進熙寧通

議

臣者詳政簡厚則民說而不擾是以有樂生之意而富  
壽臻矣三代所以得民心者也夫欲行王道而不先乎  
此者戾也是以簡苛禁厚仁術戒吏察之為明而本乎  
恕知民力之有限而用以節皆為政之所宜急者

臣者詳君子勸不待賞沮不待罰惟賞罰所以待衆人

然賞過乎輕不惟失勞而又沮為善之效罰過乎重不  
唯失罪而又賊人恩之大茲二者實近世尤病願詔有  
司審處之

臣着詳冗兵之可汰成卒之可損固已汰其所可去而  
損其所可留矣若方今未革之弊知理財之為急而不  
知耗財之所漸者增置官局是也以其所得而不補所  
失者數易利柄是也置苟不一則財不勝耗矣易苟不  
已則失不勝計矣望員品之清府庫之實難矣

臣省詳有警則嚴兵備無事則惜邊費類皆能言之殊不知費有不得已者而備不可一日弛也譬如巨藏之家曰固吾堂室而藩牆不足守曾不知外圍既虛則固於其內者將不能獨恃噫備之不可廢於邊也如此況近年戍卒其分此近郡者不為不多矣若又損外而益內安知契丹專利吾金繒而不窺邊備之虛實也

判官舉詞

本官行實利資為衆推與自主幕畫舉有所長觀其政

能無施不可

推官舉詞

本官精明謙廉敏於從事他日采用必有可觀

代王龍圖舉李國博詞

伏覩郡人國子博士李庠操守堅正博極墳史塵游不  
雜風度自遠孝友行誼推高鄉黨屢辟藩臣幕府邊事  
尤所通曉與之論議實有深識亦既倦仕方退里閭急  
才之際庠不可失

盱眙周尉忻第二考詞

夫志大而位卑者謂小官不足效往往則從而死前件  
官位以文進道為時屈官修而職舉其志何患不伸哉  
政成再幕直書無愧

招信馬主簿第一考詞

夫已嘗為之而使治其所嘗為者疾苦必知焉前件官  
列於搢紳深悉民事故主簿於一邑而一邑之民賴焉  
政雖暮月已足稱能吏

臨淮李縣尉第三考詞

官無巨細材患大塞職瀕河之地寇賊多有尉無他焉  
捕寇其職前件官悉力乃事寇亦衰減三載書績於職  
亡愧焉

王司戶第一考詞

戶掾之職甚卑而其事不得專視糾之與奪以為可否  
雖有過不至大咎前件官欲善其職而小累焉勉哉自  
力以圖後效其考可書中中



杜主簿第三考詞

前件官勾稽一邑告政三年成績可嘉直書無愧其考  
可書中中

聶司法第一考詞

法之大原緣情而度中及弊者去之或刻而好深或寬  
而務出前件官舉得中道可謂能更效職一載無愧直  
書其考可書中中

賈貽周縣令第一考詞

夫與民親而其責備者無若為邑積日累資之制行而  
昏懦貪墨者得以進故民殃而政弛朝廷患其然間下  
新格須舉乃用前件官由舉得邑悉力於政暮歲成效  
其往孰量哉其考可書中中

馬主簿第三考詞

前件官佐令再歲情與民通冤枉疾苦必即而告其考  
可書中中

招信馬主簿第三考詞

夫主簿之於邑唯才者能究政之是非與令議可否其次不越勾稽簿書足以保無過前件官掾邑三載訖無敗事秩滿而去弗媿直書其考可書中中

推官第一考詞

前件官操履純潔識度沈遠自賓幕席密有嘉畫不求聞於人而薦者交許其材也歟政已及暮直書亡媿

盱眙周縣令第二考詞

百里之邑有民與社民之休戚繫令之才否前件官為

邑再歲究心乃事職修民豫無愧直書其考可書中中

賈繹充堂長牒詞

稽於衆求學行完懋而可以為諸生長者咸以前件人為言迺詢羣議以補斯職其勉力以贊學事益副諸生之所望

楊祖益充學錄牒詞

學錄於一學之事無不與凡齒于生員者又得以佐學官而教諭之其責任重不可委非其人前件人經明學

充行信鄉里而諸生比名合議請補斯職爰稽衆言俾  
錄學事

李常充學計牒詞

學計主出納用度其職近於有司雖然非得樸茂廉實  
之士則職隳而弊生前件人性潔文敏衆謂可委他日  
從政其肯忽有司之守乎

劉大雅充典客牒詞

前件人學術該敏儀矩修飭賓客之事可使主之噫赤

也立朝聖門所取雖在庠序其可忽諸

王新轉孔目官牒詞

前件人能法而吏庀司有年茲以序陞良允衆議勉翰  
乃職以圖厥終

秦恭等補官牒詞

前件人庶以飭已勤以服事出入公府能底無過歲月  
既久茲用序遷宜勉爾勞以國成效

代王龍圖祈雪文

歲云窮紀氣則長暘顧宿麥之待滋恐新年之作癘農  
憂于野綠早暎之相仍神食此方宜戚休之與共矧曰  
聰明之德實參造化之權願乘臘天速降時雪啓田疇  
之有望銷疫沴於將然豈專神休兼塞尹責尚饗

記惡

癸巳歲予待次吳江親舍客有過邑下者動眉睫搖唇  
舌其類則人也承臺省名朝籍其貴則士也即而見之  
彼方鱸鮮鱗以恣大嚼頂烏紗而曳華袍極笑言以談

時事將枉道以興賈販徐而睨之獨布其帶若有喪者叩其端而曰親柩在南今將往矣噫聞喪之禮見星則奔乃往道以興賈販三年不見齒古之達禮乃笑言以談時事衰裳厭冠孝子之服乃頂紗而曳袍三日水漿不入於口乃鱠鱗而恣嚼嗚呼今蚩蠢之氓有一以非孝抵罪為吏者必瞋目而怒扶之唯恐不加毒戮之唯恐不加嚴若之何使斯人之徒坐廳事以風細民不毆親而胥效幸矣尚安張國家孝治之本哉將置之以不



孝之刑乎則予非立朝者將讓之以名教之罪乎則禽  
犢不知愧弟陰憤而默誅作記惡云

惜木

窮山之崖有木焉幹修而挺風剝雨蝕外無皴理樵豎  
過之弗知其材棟梁也操斧熟睨陰有戕意苟材脆幹  
弱早為爨中灰矣賴其高累丈非一豎之力能制其圍  
合抱非一斧之利能斷爾噫斯木也使幸而生匠石之  
園匪梁則棟為明堂之用久矣不幸而託窮山掄材者

猶未遇為樵豎之所睥睨惜哉

祠部集卷三十三

欽定四庫全書

祠部集卷三十四

宋 強至 撰

祝文

皇帝登寶位告諸廟祝文

秘書省  
請作

荷慶基之託踐皇極之尊祇率先猷敢忘遺命用孚神  
聽其體予衷並薦吉蠲適來顧享

南郊禮畢祭神祝文

謹以清酌庶羞之奠致祭于某神國家以上帝訖饗人

神均慶凡在祭典徧秩明祀神其歆承以對詔意尚饗

明堂前祭告千里內諸神祠祝文

國家嗣聖享禮物具庀辛月維吉將展熙事事預孚神  
聽宜有以相之尚饗

扁鵲神應公廟挂牌祭告祝文

秘書省  
請作

神以醫妙前世實為後世之賴天下之言服者必稽焉  
昔我文考曰嘉遺功追進公爵肆朕纘極不敢怠先帝  
之命令新厥廟榜而致祠於神聿來歆承永孚庀於後

人尚饗

泗州龍王祝文

告于某神曰惟泗介淮汴之間以為州今二水交激幾  
圯城堞勢遂不已則州民之命未可保也刺史憂民之  
憂以告神神職在水事宜察刺史之憂以為民之福使  
水平堵廟食無愧尚饗

代祭水平王祝文

告于某神之靈曰農訖力于畊畝苗未暇獲而雨久不

止疲農之力殆敗於垂成則國之租稅與神之享祀將  
無以供給神食此土見民之急而必加救焉使陰霾廓  
然農得以歛獲永永廟食宜無愧也敬獻牲羞伏惟尚  
饗

贈司徒兼侍中龐籍祭文

秘書省  
請作

維靈以耆德碩望為時宗臣嘉猷偉謨實相先帝還印  
綬以去其位賜几杖以休於家進退大方始終一節吁  
嗟故老不及體貌於生前稽案舊章猶得哀榮於歿後

葵車云邁真解爰傾爾其歆承體厥嘉悼尚饗

贈侍中許懷德祭文

秘書省  
請作

贈侍中許某之靈嗚呼惟左右臣衛嘗一日勤王家及其死者猶悼以恤矧有自踐行五迄統禁旅始終恭瘁垂五十年予思及勤莫此為久今祖爾殯特深朕悲尚饗

淑妃董氏贈祭文

秘書省  
請作

故淑妃董氏以柔明之範為後庭之率以靜端之性謹

中閨之承允執婦順參基王化聿懷內助曷忘永悼猶有形管可鑑媿蹟故夫四妃之號亞后之寵所以極哀榮之典而且慰吾懿主之悲也爾其歆承祇我休命尚饗

祭潘太保文

惟靈資畧沈毅為時虎臣久次環衛終始一節某頃與公子嘗聯官局今邑境之內攢樞在焉敢緣子契以致薄奠伏惟尚饗



祭青州劉元瑜待制文

學有淵源志存廖廓憲府橫飛霜秋一鶚正論所擊姦  
邪膽落其佐大農慮精器博金穀坐計毫釐較若屢典  
劇州憲平俗樂幸來帥青自有方略勸其民人載勤耕  
鑿束其吏兵無敢驕矍惟厥仕官淹速誰度始驟中綏  
終止延閣用不及境舟藏夜壑青人哭之聲動城郭士  
林之嗟才豐報約追惟昔游慈恩宴醪三紀於茲年契  
所託迸淚朔風寄哀冥漠庶幾歆承亦有肴酌

祭左藏韓則順文

往來塞上協濟疆事暑行遇疾遂報不起子幼室遠孤  
魂異地後事之責庶幾盡力憑酒以告其無有憾尚饗

祭文學陸先生文

維年月日具官某謹以清酌庶羞之奠恭然于故杭州  
文學陸先生之靈某辱先生諸孤命輒以不工之銘汙  
先生墓石道盛德衆有所漏而不盡紀縱紀之又才弱  
辭俚將不能暢其美于無窮而取貴于後世是未足為

先生報而適足負先生也某時以少年出窮巷鄉黨無  
知而禮之者先生一見獨忘其齒之尊納以為上客日  
規月誘其後意未有一日而不繼前事者既而某得薦  
於鄉得第於廷州以掾於縣獄以全於民莫不去受先  
生教而歸拜先生賜也前年來京師先生飲以別徹酒  
把袂眷眷有不忍分之色今某官此而先生死且葬矣  
不得泣送先生之柩見其入於土中某之恨何時可已  
耶尚饗

祭致政薛郎中文

嗚呼德業涵演氣質渾厚百未一施竟虛其有賦如涕  
漣省郎州守時弗我用矧曰冠綬褫之以歸日縱杯酒  
人琴俱亡已則不朽君有仲氏毋卹于後尚饗

代馮內翰祭田樞密文

天故生公其必為時道德之積仁義之持不暇公年乃  
奪其施人事可悼天理可疑公未入官曠懷萬世孰成  
於治孰敗於弊涵養閎肆奚發科制人始知公志在康

濟帝嘉奏篇策公臨軒筆應大問江河倒源講始見本  
槩獎至根人又知公不獨有志而且有言華纓長裾陟  
降清禁言必允蹈重亦自任正論所激諛口隨噤四海  
之歎利津未浸乃使三司乃副樞使兵哺邦蓄既富不  
匱民足戎膽仍縮不肆匪唯志言又驗行事行秉大均  
義冠中階以公取之如探諸懷寒暑之沴生理有乖霖  
雨弗作樞躔竟埋人之悲公止以不相若某之悲夫豈  
有量姻好之未矧託無狀憑酒叙哀庶公來饗

代王尚書祭賈魏公文

初公以教師太學生其後以經術講禁中始知公道德  
文學之蘊充然其闔以茂也已而長臺府登皇僚秉鈞  
制樞而百工以職四夷以寧又知公經濟輔弼之業自  
任乎其重而有餘裕也公之去魏某實承其後聞三撫  
魏人而一煦以恩魏人德公若赤子之愛慈父母訃至  
之日塗驚巷嗟或老幼相持以類然後益知公恭已施  
人其佐天下之大而臨夫千里之內其政之所施得民

心若此其固也嗚呼起儒服至台衮始終無一毫失道  
公其賢矣乎出入將相餘二十年六換節旄而卒公享  
大國勇骨強體幾以壽終公其具福而無憾矣乎其所  
以南望而致哀一奠者徒以為國惜老成人而且慰魏  
國之悲公爾尚饗

代祭范資政文

惟公先識遠業發於天資再命京寺言高位俾書抵相  
府琅琅厥詞謂治先急育才練師位晚自得言十九旄

飛緜諫朕鋤姦救疵作尹京邑權豪沮哀讒口信信構  
成駭機公足一蹈顛跋弗支朝為大尹暮從小麾旁顧  
驚悅公甘若飴既黜而寤詔旨趣歸西戎寇邊兵要執  
持朝廷議才曰公是宜敵聞公名膽縮魂飛相戒以退  
無干公威凱歌言還參貳衮司欲主堯舜期身臯夔功

業未竟太平始基

案此下  
原本闕

代祭張密學文

嗚呼厥有木焉材堪棟梁而他室是用不克構乎明堂



與夫賢人器也經綸而官止近侍不及秉乎大鈞可同  
悲而共辛噫明堂之不構豈木之陋實掄材之弗偶大  
鈞之不秉豈賢之病實有生之弗慶惟公業履純正材  
謀偉奇禹司袞章陰實與公期宜而弗為其命也歟  
惟孱弱姻婭是託泣遡西風飾疎酒薄聊一薦於由表  
慨哲人之不作尚饗

祭俞戶曹文

嗚呼愎姦顯榮而端善梗閑不仁永年而仁反天奪嗟

嗟叔微而止於斯若壽與夭其偶然歟將籍已素定而不一可移魂也莫詰孰平予悲頃愚與君同旅京國予負宿狂奏書自直時久不報相視以惻既而洒然喜動君色春風鮮鮮遊騎並鞭秋月娟娟飲帽對偏君朝顧我我暮君邊一日少濶怒如經年富者遠貧奚啻避寇君獨親我忘已之富寒餓水火將蹈而就繫君出力援手以救始君調官版掾赤城君出銓門予賀以迎廣文鄭虔有唐先生猶昔官此實為君榮未幾東下我送於

野餞壺欲傾別淚盈把躊躇道旁意不忍捨都門獨歸  
淒然匹馬南望寫懷兩寓音書曾未我答君纏中虛賀  
客旅踵弔賓在廬哀樂反覆止於月餘訃音初聞駭怛  
幾絕厚德未酬胡然永訣歿不哭棺殯不臨穴一慟寢  
門心焉寸折將盛以奠寄哀以辭嗚呼叔微知乎不知  
尚饗

祭崔郎中文

嗚呼一府衣冠莫盛北門君實貳尹質厚氣渾羣處公

議言寡出口靜固宜壽胡然獨否服金餌石結憤蓄懟  
發而為疽徃徃在背云胡不然而有斯疾以迄不起終  
莫之詰不鄙謂予可以託孤予受所託罔有弗孚漚酒  
叙哀魂知矣乎尚饗

祭齊郡君文

惟靈稟生德門靜柔令慈作配君子母婦是師貴而從  
夫顯封是宜象服魚軒庶永壺異如何奄忽遂隕淑姿  
樽酒有藪侑哀以辭魂克不昧其顧歆之尚饗

代開封府知府推判官等祭安國夫人文

嗚呼夫人之生慶門淑姿於赫元宰曰嬪其室婉婉其  
從祇祇其慄為婦伊何祭職不失為母伊何德均以壹  
爵德夫尊克成厥家大國斯封象服載華被躬者翟飾  
首者珈間朝中宮前導後遮命婦孔羣班莫我差邁疾  
素秋游神紫霞露濕銘旌風淒葵茹宗族號送爰百其  
車奠筵相望道途咨嗟生榮沒盛魂其知耶伏惟尚饗

行狀

龍圖閣直學士朝散大夫給事中充同羣牧使兼  
知審官東院權發遣開封府事上柱國隴西郡開  
國侯食邑一千二百戶食實封四百戶賜紫金魚

袋李公行狀

曾祖守澄皇任開封府襄邑縣尉祖珣皇贈殿中丞父  
陟皇任尚書屯田員外郎累贈尚書尚書公諱中師字  
君錫姓李氏其先博平人從徙魏之內黃又徙京師今為  
京師人公幼孤能自刻苦過成童已與鄉貢既冠中景

祐元年進士第類得補幕職便母夫人邊氏養俛就廣  
德軍廣德縣主簿為令者鄣一縣賴公以治居無何以  
母喪去官服除用制置發運使舉以真州軍事判官監  
蘄州蘄口鎮都鹽倉課上改大理寺丞知開封府鄢陵  
縣會歲旱詔案苗免租其佐不問可否一切欲免公曰  
被旱有淺深奈何一切免也止蠲其可免者民憤且率  
衆訴府反劾公公鈎得倡者即致之罪由是民吏率服  
而尹亦以此知公才也已而僻公管勾本府檢校庫宰

相薦公文章召試入等充集賢校理判太常院又判登聞鼓院遷殿中丞提點府界諸縣鎮賜緋魚袋又遷太常博士時屬邑多盜吏不時獲公為設方畧躬自督捕而盜悉就縛朝廷議加一官以賞公勞公辭曰此提點職爾冒賞可耶遂已入三司為度支判官大享明堂恩轉祠部員外郎淮南轉運使改刑部員外郎復為判官度支遷兵部員外郎使契丹還授河東轉運使面賜三品章服改工部郎中召拜三司度支副使遷刑部英宗



即位又遷兵部尋除天章閣待制陝西都轉運使改諫  
議大夫始至兵部不卒歲公駭因籌所以轉給及去知  
澶州陝部之蓄已足知數年矣澶當北使往來之道乃  
城庫不壯公曰此不足自衛且無以夸鄰國遂增築侈  
舊加甕城其上時出按役城成莫不如古制後北使過  
果驚顧發問按伴以非在設備特體勢適然為對北使  
亦稱善歲滿入判官部流內銓三班院又判太府寺今  
上即位遷給事中京東歉往安撫一路使還留守西京

先是雖吏恬於慢令官逋省帳至有十數歲未追而不  
發者公至即追而立發之無一敢緩者歲率三進牡丹  
又府例以百花名會然花費一出民間每進花及會作  
花價必翔貴民苦歲市公亟奏罷之會亦尋廢入判都  
水監權發遣三司朝廷以公治雒有素且聞雒人之請  
特除龍圖閣直學士復守西京初雒中旱開府日雨輒  
大作都人喜目其雨曰隨車一日甘露降園亭取而食  
之如蜜寮佐議以瑞聞公曰歲穰物和民不受敝乃瑞

也此何足道於是議者慙而止適辛亥役法下公善究  
立法本意即推行之最為天下先而天下之行新法者  
亦莫不以河南為準公前後守維歲輒大稔或去或旱  
曠風雹隨起為政務先惠愛故所至必治而其去必見  
思也召歸充羣牧使兼知審官東院久之開封尹以事  
出境上命公權領府事早作聽斷日過中已庭無留訟  
未幾感疾疾且革猶條未決事以屬幕府翌日遂終羣  
牧之正寢熙寧八年閏四月十四日也享年六十一公

屢試要劇無一不修舉大用謂在朝夕及其死也物論尤為公惜公性仁氣溫平居與人言唯恐忤物及當官處事苟一決於心雖羣議旁撼不動也即有可聽隨改不吝若勤職奉法不以一毫私已特出於天性爾初陳丞相執中居守南都公年妙韻爽一見公於學即許以遠到及讀公所業復以早成期公他日卒用丞相薦得帖職後果至近侍丞相薨始不得美謚公力爭於朝遂改謚恭君子以丞相能知人公為能報知己也公博學

善屬文復喜言當世事仁宗朝嘗著十三策號曰裨治  
以進天子以為善降璽書褒諭後朝廷有所更為往往  
多如所論者長於歌詩頃使契丹往還得詩百篇當時  
殆為絕唱凡著文集奏議五十卷藏於家未始輕出示  
人故人亦罕有見者筆札尤妙得徐浩體濟以清勁遂  
自成一家孝子之得銘先墓者獲公書石始以為慰幸  
公累階朝散大夫上柱國開國隴西爵侯食邑一千二  
百戶食實封四百戶初娶劉氏再娶呂氏封延安郡君

故相申文文靖公之孫翰林侍讀學士諱公綽之女相  
成以法度蓋有內助焉生一男持正太常寺奉禮郎亡  
女一尚幼餘皆嫁良士真州軍州推官羅浹殿中丞張  
規同州朝邑縣令張宰大理寺丞晏元靖光祿寺丞呂  
之問國子博士陳世脩其婿也卜以今年五月某日葬  
公衛州新鄉縣貴德鄉戒海里合劉氏之穴某實佐公  
羣收因得狀公厯官行事以獻能文宗公求銘公墓云  
謹狀



祠部集卷三十四



欽定四庫全書

祠部集卷三十五

宋 强至 撰

誌銘

桂州司法參軍贈太子中允葉君墓銘

君諱某字杲卿姓葉氏世為杭州錢塘人曾祖諱某避  
亂唐季故名不載仕牒及錢氏王吳越祖諱某考諱某  
始受偽爵後吳越以國歸京師凡陪臣之從行者皆受  
命於朝獨其父中道以事辭歸不得命已而自悼曰吾

悔其可追耶當擇吾兒之秀使應舉覓官他日吾家有  
天子命士與身得均耳君生而穎拔遂讀書成父志凡  
三試開封府進士而考官率以高等處君訖用嘗試御  
前恩授鄭州長史後司法桂州參軍慶厯六年十月二  
十八日以疾卒官所年五十九方君之在桂有閩人吳  
謚死象州武化縣令謚妻挈二女欲歸閩至桂而其妻  
又死時本道轉運使杜公祀在君父子間為知己哀吳  
無所歸欲妻君二子君曰為子娶婦豈勢利之娶而舍

孤窮耶從之人以為義家故饒財諸弟用之殆盡且求  
異籍君喟然曰家道至此繇吾不能取厚祿以聚親族  
汝曹何咎耶惟汝欲其寬厚多此類師事郡人林先生  
逋先生篇翰為當時二絕君盡得其妙天禧末年錢塘  
有巨石浮於江太守異之即問先生此何祥也未有以  
對先生以問君乃按譙子五行志以應曰其為萬乘之  
憂乎未幾真宗棄天下於是益服君多聞而始知譙子  
之志為奇書君早以經術自任晚傳其學於二子二子

者昌言祕書丞昌齡尚書屯田員外郎同年取進士第  
皆有學行政術知名士林聞次子先登朝始用祀明堂  
恩贈君光祿寺丞累至太子中允君配宋氏封萬年縣  
太君三女長適漳州判官周彭孺次適常州司理參軍  
晁端仁李適邵武縣尉徐簡孫君初與英宗同諱沒後  
凡若干年追改今諱二子於某同年生同既卜以某年  
月日葬君於錢塘縣復泰鄉北山之原因以銘屬其銘  
曰有寶於此積勤蓄久三出以幣不豐厥售衆人之得

君獨無有維其不偶是以有後

尚書都官郎中盧公墓誌銘

皇祐二年冬十一月十九日將葬贈尚書都官郎中盧公諱諮於濰州昌樂縣長壽鄉鳳林里祖塋之庚地公子泗守比部郎中某名屬吏司吏參軍強某語之曰吾父世濰人累以明經舉鄉里不第因太息曰士之仕也欲行道其進也欲及時吾時過矣吾道不行矣寧若教吾子以成吾志乃授予以經不復言仕進間嘗語予曰

夫經豈空言哉居者守以治其身仕者傳以行於事吾止得治身之效而不及行事之深切汝齒尚幼汝學不已二者俱享焉予懼不能成吾父之志故夙夜強學以自勉一舉而中第此予登朝而吾父死矣始用郊祀恩贈為大理評事累贈至今官卒時年五十三人皆謂善有餘而壽不足今也將葬予其為我銘之某再拜曰唯銘曰

生公孔難宜深而蟠志卒乃完子榮公官公宅既安公

後其蕃

尚書虞部郎中曾府君夫人廣陵縣君朱氏墓誌  
銘

皇祐五年春晉江曾君諱濬由殿中丞知蘇州吳江縣  
是年冬十有一月八日喪其夫人廣陵縣君天長朱氏  
夫人於某為外姑既哭夫人於其官舍明年春公遣二  
子奉其喪往窆杭州之天竺山某又得相其終事後十  
三年殿丞為虞部郎中卒知光州卜以某年月日葬鄭

州之新鄭二子者復遷夫人之柩自杭來合葬夫人之  
考諱與嘗擢真宗朝高第後為兵部侍郎贈某官夫人  
生而其父已顯又極為其親之所愛目所習見者盡富  
貴也身所嘗享者盡豐佚也入門事舅姑能左右不懈  
歲時賓祭必嚴服潔具不敢後諸婦若素歷艱難然方  
其夫在州縣而食客嘗滿坐用一不給輒陰嚮奩中所  
有而辦之其享之而退者無不腆之語入而其夫無不  
足之色若慣處賸約然弗煩傳姆之教而女功善不失



上下之懽而家道得皆天性之所自有也二子者用其  
世父丞相充國公蔭孝綽今為光祿寺丞孝總太常寺  
太祝女三人某其最長婿次嫁衛尉寺丞王諶次嫁殿  
中丞杜諲於其葬也某又得銘其墓銘曰

嗟夫人性慈祥式母婦宜壽域四十四奄云亡先族葬  
於南方後踰紀合夫藏

汝南周氏夫人墓誌銘

夫人餘杭周氏女二十嫁郡人朱有安入門主饋上下

相慶公姑曰能孝我僮媼曰能仁我閨房雍雍樂得賢婦朱氏素貧約夫人治生頗力家用是豐給生男四人宗顏宗孟宗閔皆富而有守其一曰仲琪為比丘有律行女三人長適姚宗雅次並幼夫人年五十六至和二年十一月二十一日以疾終靜柔淑祥性酷嚮佛朝不茹葷逮暝弗變遺命諸子鬻奩中所有以飯浮屠其真所為好善者歟將以明年三月二十一日寔履泰鄉顯明寺之山園諸孤來乞銘因銘曰

夫哭順妻子號慈母弗行厥齡而德有裕

將仕郎守杭州文學參軍陸先生墓誌銘

嘉祐六年夏四月丁巳先生陸氏卒其子求古章草軍  
有方逢休將以某年十月己酉合其母夫人蔡氏偃泰  
鄉龍井村之封以葬六孝子者聚泣以議吾父蓄道淳  
德生七十有六年其蘊不得久施於時死矣獨世之大  
夫與鄉人之口有傳焉且吾父誼應銘其習予父子間  
而應以文字銘吾父者宜莫如強君以書來求銘某因

得次以銘先生諱滋字元象歲方童已自如成人通毛  
鄭二詩易春秋既冠以文辭試鄉舉一鬻其業而售有  
司母且病不行後三年復在選察母面有難別色先生  
亦絕口不忍出別語已而自訣夫仕不獨為時亦為親  
苟感吾親而去得仕如勿仕吾何為行哉時故相陳公  
堯佐使兩浙雅待先生厚手十餘書以遺之曰行矣持  
此足以遊公卿先生謝不受公亦不能強自是頽然自  
得顧天地間無足介吾慮者惟一肆其意於書不復言

進取九聖經賢史九流百家僻異祇說無不讀或引以  
答客問必章解句析卒不差一字問者退輒服以為終  
年讀書不如與陸先生一日語尤嗜風雅日哦樹石間  
有以家事關先生者急麾之使去曰吾方作詩無溷我  
皇祐四年詔錄先朝遺士搢紳縫掖合百餘以狀白府  
請用先生塞詔府上之朝得杭州文學先生捧旨喜自  
以不出屋廬間天子就官我又獲掾於父母之邦抑幸  
矣歲時隨州吏趨公府或憫焉先生曰此跡爾惡屈吾

心哉常治居材且具矣其隣有以侵我地給之者先生  
第笑與語吾忍取券以白汝妄耶即為之縮材其寬厚  
多此類與故人飲必諧調笑歌賓主各盡懽若將樂之  
不厭然及賓去席撤復以嚴自處里俗襲吳越偽禮其  
甚者至僭惡不可聽先生為援典制家橋而戶正之此  
敝遂草平生所著詩賦文論書誌合二十卷自就學至  
垂沒目未嘗去書若先生可謂好古信道終始自篤而  
不變者歟大王父諱超以功為錢氏衢州刺史王父諱

紹父諱承祖皆不仕女二人皆有歸銘曰

於乎先生養璞自少成而珪璋訖曰能照唯是羣籍我  
攷其要矯革偽禮俾道非肖與時獨行追古同調元龜  
云亡人哭人弔濟濟有子德罔弗紹於後其門當大有  
耀

安府君妻趙氏人墓誌銘

嘉祐六年十二月九日大理寺丞知開封府右軍巡判  
官安君既喪其母夫人趙氏於官舍將以明年四月某

日還葬其州之吳縣靈巖鄉吳山某原以狀與疏託銘於某曰不孝不能致封號之榮於父母之存今死且葬若婦儀母規又將泯而不克紀是重不孝之恨於已窮君忍不銘吾母耶某又何可辭夫人蘇州人三世無仕者幼孤隨母嫁張氏遂假氏以張既長歸安府君入門盡婦道舅姑喜嘗語之曰今若善事我他日當得賢子婦以為若幸已而長子及婚里人有甚貧者願以其弟之孤女為配府君議未決慨然曰彼欲以遺孤託吾兒



納婦必勢貲耶第娶無易府君於是不能奪已而其婦  
果賢卒如舅姑言府君始娶陳氏夫人繼之凡子男四  
人夫人出者長寺丞君也次翰早死次沆應進士學女  
四人其三出夫人而夫人概視之雖習於安氏者不知  
孰為孰出也享年六十八以疾卒吾嘗愛寺丞君當官  
不屈倚而剛介謹廉以自持亦夫人內教云銘曰

我勤姑嫜夙夜左右男女我戒以順以守刻此銘辭以  
貳母婦

朝奉郎守尚書虞部郎中上輕車都尉賜緋魚袋  
曾府君墓誌銘

曾氏得姓最遠其族散在四方未聞有顯者繇泉州晉  
江之曾諱某始以文學取進士高第久之進修撰集賢殿  
復有子今丞相僕射充國公能世科等既貴得追贈三  
代故自曾大父諱某連修撰累至太師中書令兼尚書  
今又命豫楚二國以公其祖父於是曾氏遂大顯公諱  
公望字武仲丞相之弟楚國公第五子用父任補太廟

齋郎嘗一試進士不中曰安能事此求合耶遂勉調州  
縣後數年主明之鄞縣簿是時朝廷用兵西方詔舉材  
吏可為縣令關中者或薦公可任即拜衛尉寺丞知華  
之渭南縣由寺丞八遷至虞部郎中由渭南厯簽書寧  
海奉國兩軍節度觀察判官事去持楚國太夫人喪服  
除知舒州桐城改蘇州吳江縣知忠州通判江州遷光  
州以卒公囊蓄智慮視天下事無難者僅纒出鱗見措  
之行事人固以為不可及渭南豪家置磴以擅水利歲

早一勺不以與人公至即破磴渠水使得與衆共九溉  
民田千頃杭州江堤壞水使極悍一州恐當立辦堤役  
諸從事莫可與者太守以屬公即白下諸縣調丁夫至  
則富陽人欲亡役撼衆公鈎得唱者梓致之罪衆懼且  
力堤亟成有詔褒諭忠州民負官鹽十七萬有破產不  
足於償者或負者死至子孫猶償不釋公奏罷之仁宗  
朝寬卹諸道民力遣公江西多稱上旨治平二年淮察  
錢公適為光州流民聞仁政日輟其境募富家出倉實

以食之人活數百萬，照窮卹弱。一郡視公猶父母。明年正月二十一日，以疾卒於官。凡閤封之人與旁郡之饑民食於光者，哭數日不絕聲。嗚呼！公仁若此而壽止五十七，官不過一州守，豈其命耶？其臨下氣嚴色厲，若觸之立蹠於咎，而中實寬然，以恕與人交，誠至誼篤。滋久不壞，雖甚愛物，彼挈之以去，不問即有所欲取於彼，亦不為辭謝。又天性強記，文字一經目輒終身不忘。好談前史，事歷歷如指掌。善刑名書，或問某事若是法，何如？

曰某事應某法聞者服其精嘗著軍政備覽二十七篇  
撫諸家兵法為之說觀其方畧三軍可將九材之用用  
世者卒不一施其可悲也已娶朱氏封廣陵縣君兵部  
侍郎贈某官巽之女靜柔淑明先公十三年卒子男三  
人孝綽光祿寺丞孝總太常寺太祝孝縕太廟齋郎女  
六人長適某次適衛尉某丞王謏次適殿中丞杜諲餘  
尚幼公之在吳江夫人卒焉遂葬杭州之天竺山及公  
葬有日孝綽與其仲弟遷夫人之柩自杭至乃以某年

某月某日合葬鄭州新鄭之墓原銘曰

公初起家父蔭是承中則已致乃終有稱公在郡縣害  
寢利興豪奪爾破衆搖爾懲釋其負逋如解急繩哺厥  
饑口數不可勝惠於民人義於朋友裕其在已需然自  
增強其在天則莫我能亶有餘祉後人是膺

贈衛尉卿梁公夫人李氏墓誌銘

戶部侍郎梁公諱某之冢婦衛尉卿諱某之夫人姓李  
氏其考諱著有寵真宗朝至濠州刺史緣藩之舊前後

賜予甚渥家以富盛夫人年十六歸梁氏方是時侍郎  
議審刑院及其季舒國公在翰林為學士合處京師族  
大用屈夫人入門能服勞履約如素習然事舅姑終日  
無情容撫諸子人莫知為嫡庶者衛尉愛客樂施每鬻  
奩中物以佐之其來而享之於外者人稱所欲而其夫  
不見不足之色率不知費自奩中出也衛尉喪不衣采  
食葷以此終身焉一日感疾語諸子曰七十人壽罕至  
者矧吾年又加二吾死何憾獨乃父有志無命不克大



耀以死吾所慙然者如有待於後汝曹其勉諸語訖不起嘉祐五年六月九日也夫人喜釋氏書且深探其理能頽然委順不惑於死生之際豈非效與夫貴封永安上黨二縣君後以子改封贊皇縣太君子男八人曰訪湖州德清縣令卒於官曰詠今為太子中舍人致仕曰詢今為尚書比部員外郎曰彥世今為廣安軍岳池縣令曰誦曰詒並郊社齋郎曰諷梧州司理參軍曰翊鄆州壽張縣尉皆早卒女九人長嫁試將作監主簿李貫

之火嫁尚書屯田員外郎王衛火嫁進士郭宗道火嫁  
右班殿直張個火嫁進士武攸餘未嫁早卒熙寧四年  
九月甲午葬夫人鄆州須城縣登庸鄉調鼎里望南山  
之南原祔衛尉卿之兆銘曰

來儀大家雖離其鳴仰肅俯順婦道以成宜爾君子卒  
至正卿盛服文軒始從夫榮子籍在朝顯封載更壺則  
不外有聞維聲孰曰男子獨後有名請視銘章以較重

輕

太常少卿楊公夫人福昌縣君王氏墓誌銘

太常少卿楊公諱某之子曰元崇元忠將葬母夫人福昌縣君王氏於某縣某鄉某原合太常公之兆以至聯姻聞夫人宜最詳願有銘諸墳噫至固聞其賢矣方其歸楊氏也太常蓋嘗娶謝氏生二女矣夫人視之如己出比夫人生二男其愛行男女間未能有以毫髮窺厚薄者後女嫁至竭匱中所有贍費且王氏故顯祖樸贈中書令父球任尚書兵部員外郎夫人獨能忘貴驕之

習奉其夫以禮入門主饋無一日輒懈太常卒登州護其喪以歸非臨哭與祭未嘗不勉子於學以故二子皆有文元崇前大名府內黃縣尉元忠太廟齋郎至始見夫人於堂上環立而左右者無一有惰容既知其得家節也及其亡而往奠婦媵皆哭盡哀知其能以仁逮下也夫人達佛理故死無怛惻樂施與故歛無餘服得不得謂賢也已享年六十三熙寧四年十二月甲子以疾卒其葬以明年三月某日其封君福昌也繇太常登朝用

郊祀恩云銘曰

事生送死盡禮君子出禮愛均鴈鳩之仁維此懿德母  
婦之式

朝奉郎尚書司門員外郎通判大名府兼北京留  
守司畿內河堤勸農及羣牧事上柱國賜緋魚袋  
李君墓誌遺事記

尚書司問員外郎李君既葬之明年其嗣子鎬自雍以  
書至京師謂余曰先君之葬端明年公實銘其墓當時

遺其可書者數字鎬食不下咽者亦既一年矣今得盡書之以碣諸墓遂使先烈不泯於後鎬無愧為人子矣乃從而為之書君初監密州稅一日同職為大適所紿閱貨不為實將稍隱其數以曲減征算君固執不可不聽遂往白州守時蔡文忠公守密特多君而沮其同職者復器以為能吏由是知名一郡故敢以少年視君後為縣崑山有監酒楚豫者貧甚能以廉自處君憐之先是縣主田獨酒官無有君議斤已田百畝主簿尉各半

之以割隸酒官莫不以君議為當至今為例不改嘗與尉同得偽印尉圖免遠官願獨以為己獲君一聽尉便訖不復自言後州守柳公植轉運使葉公清臣聞之交稱斯二事皆刻己以與人亦常情之難能者鄭文肅公為杭守辟君幕府州事多所倚辦公移雍而代者宿望於公輒鉤撫公短同幕吏有雅不為鄭禮者請索公庫副厯以尋其隙代者悅明日果索副本君曰庫有正厯奚用副為前此毀之矣代者無所得既而嘆曰天休雖

去此幕中猶有人焉吾無能為已復從辟京兆謁丞相  
呂文靖公於都下見之喜意將用君未幾且坐事方是  
時朝廷專以文法升絀天下士一跌遂不復振君明果  
有餘而智慮無不足者遇事無問難易而一切敢為使  
君而得至於今之時棄瑕以錄可用之才挾術舒蘊馳  
騁從事於其間其進而取功名也未易可度於戲死矣  
豈其命歟君諱某字景仁若世次閥閱行治則具王公  
銘序云熙寧六年十月十七日



權大名府朝城縣主簿陳君墓誌銘


君諱肱字叔良洪州武寧陳氏子生而諱嚴貌似仲尼  
衆目為陳夫子然其中亦自信不苟讀書務通大義其  
為文瞻而有制舉進士中皇祐元年第釋褐鄂州江夏  
縣尉遭母喪去職服除主舒之懷寧縣簿又司法大寧  
監未滿去持父喪既又權寧國軍節度推官後補安州  
雲夢縣令未赴而縣廢改大名府朝城主簿闕君曰是  
亦為祿乃絀其資以就久之留守韓魏公知其賢本道

都轉運使繼以事諉君且交稱君為才未及薦熙寧四年春役夫漳河君部役河上四月朔得疾以歸經三日遂卒享年五十三貧未克舉葬權窆浮屠舍後四年長子碩扶其柩歸以某年月日葬君先塋之次大畧君為吏敏於舉職其行已廉於自進其在寧國也是州之寄倉蕪湖者於出納為最劇監司之委主吏常艱其選凡前後兩屬君一切務去宿弊而或有餘數其在江夏也歲凶多盜君捕無遺類掾曹忌其功悉從末減故盜得

不死賞典亦從而殺或不平之君曰捕盜尉職爾必欲害彼以利我豈吾心哉於是忌者聞以愧初君之主簿懷寧也考試黃州進士得今太子中允孫公素賁程文讀之喜即擢為第一明年公素登進士甲科且名在第八後籍籍為聞人於是人莫不以識鑒推君而君亦以此自負公素報君甚厚君死卹其家以其弟員娶君之孤女後君之所以得歸葬其鄉皆公素力也君於知言可謂無負矣然士大夫猶為惜者獨無位與年不及少

紆其蘊耳君曾祖諱某祖諱某父諱某皆不仕娶余氏  
生二男曰碩砥一女孫氏婦也銘曰

嗟夫君命孰使莫或行輒此止用慊心術足已得一賢  
享衆美貽後慶在二子宅新宮安故里嗟夫君茲已矣



祠部集卷三十五